

Ciethawfwen Lungzcouh:

Sing Fwen Haprwenz Va Angj Hai

龙州千年歌圩节：山歌唱得百花开

Yenzsiuh Daezveihloq Siobvunz loz

Yawj doiqfwen yienhciegz, humx vunz cien vunz fanh.



▲ Vunz haauj Miuhfuzboh, gyo'mbaiq goeng Maj Yenz.



▲ Ngoenzneix raeuz doiq fwen, doxdwen guh baengzyoux.



▲ Ngoenzneix sim' angq lai, gwnz daizheiq diuq foux.



▲ Daj iq rox gingq laux, haqswnh geiq ndawsim.

“Bibi youq ndwenseiq, laux-nyaq angq doxcomz; saulengj daenj buhromj, gaem laeuj guenq daegmbauq……” Hot fwen neix dwg bouxgiyinz Bouxcuengh mwh doenghbi Daugvangh Ciuhsingh raizij ciethawfwen yienh Lungzcouh ndeu. Moix bi liggaueq ndwengeih daengz ndwenseiq, gak cuz beix-nuengx ranghdieng Lungzcouh caiqlij miz gyoengq mbauqsau guek Yeznanz dem, daj seiq fueng bet baih caenx hauej hawfwen yienhsingz Lungzcouh roxnaeuz Ginhlungz Cin doenghgi yanghcin haenx bae, eu fwen dingq fwen, gyau youx damz cingz, yawj yienjheiq caeug guh diyz doxdax, daengx aen hawfwen sing fwen haprwenz, sing riu goksad, hwnz-ngoengz mbouj dingz.

Ciuq sawgeq geiq naeuz, gij hozdung hawfwen yienh Lungzcouh caeux youq seiz Ciuhsung couh hwnghoengh, daengz seizneix gaengq miz it cien lai bi lizsij, daengx yienh miz baenz 250 lai giz hawfwen hung-hung iqi haenx, dingz lai dwg youq moix bi liggaueq ndwengeih daengz ndwenseiq seiz cin raeuj va hai neix

hoengh banh. Ndaw yienh Lungzcouh aen hawfwen ceiq hung ceiq hoengh de dwg ciethawfwen liggaueq ndwenseiq cibsam youq yienhsingz banh haenx, ngoenzneix caemh dwg “ngoenzseng fuzboh”. Ciuq lwnh naeuz, liggaueq ndwenseiq cibsam dwg ngoenzseng boux fuzboh ciengginh okmingz Maj Yenz Ciuhdunghhan, seizhaenx Maj Yenz daiq bing daeuj baihnanz guek raeuz humx hoenx fanjlueh seiz youq Lungzcouh capbing gvaq, doiq henmaenh henzguek, haifat henzguek laeb roengz goenglauz hung, vunz Lungzcouh vih geiqniemh de couh hwnjguh le “Miu Fuzboh”, caemhcai q dingh youq ngoenzneix bae naj muih guh caeqbaiq hozdung, doiq fwen yienjheiq, foux lungz foux saecej, cuengq daengdah, nauhyied dangqmaz. Ndaw yienh Ginhlungz Cin, Sanglungz Yangh, Sangginh Yangh caeug Mbanjminzgen, Mbanj-go' gyap daengj 20 lai aen gwnzhaw lajmbanj, moix bi cungj guh gij hozdung hawfwen conzdungj vunz lai gyaed dingq maij yawj de, gyoengq mbauqsau doiq fwen ra youx, gangj

cingz dwen ndiep, gyoengq vunzlaux cix youq ngoenzciet heuh geij boux hujgeiq, naengh henz daiz caez gwn laeuj, lwnhgangj gij saedcej diemzvan de, maqmuengh dajndaem dajciengx ndaej demsou. Gyawj geij bi neix daeuj, gyoengq vunz lai Lungzcouh lij hwngh guh aeu dienhvah caeug soujgih ma doiq fwen, bak humz sim haenz siengj eu fwen couh dwk dienhvah ra doih, gek singz gek mbanj dwk hai bak “byonghmbwn doiq fwen” hwnjdaej, cungj hingz sik daegbied neix lij cienz daengz le gyoengqvunz youq dep henzguek Cungh Yez haenx, humx dingq gij “fwen byonghmbwn” hamj gyaiq gvaq guek neix, vunz lai caemh roxnyinh mizyinx raixcaix. Ngoenzciet, gwnz-haw lij baijdan deihaendaen, gai huqdoj dangdieg, guh faengxgaeuvaiz, faengxraemxndaengq, haexnaengj haj saek, ceizet lai saek doengh gijgwn gig miz daegsaek dangdieg neix hawj bouxhek cimz gwn, caiq cawx saek di daiq baema hawj vunz ndaw ranz roxnaeuz baengzyoux caez gwn, caemh haengjheiq angqyangz dangqmaz.



▲ Baijdan gai faengx ceiz, hawj caezgya cimz feih.



▲ Canghfwenz iq uk lingz, damzdingz eu fwen sek.



▲ Yienj cit foux-loihmangz, diegdangz vunz humx yawj.

► Gaej yawj gou vunz nyaq, cog ndaej dang fwenvuengz.

